

MINISTARSTVO PRIVREDE**66**

Ministar privrede Hercegovačko – neretvanskog kantona, na osnovu člana 55. stav (2) tačka b) Zakona o organizaciji uprave u Hercegovačko – neretvanskom kantonu („Službene novine HNK”, broj: 9/09) i člana 12. stav (4) Zakona o rudarstvu Hercegovačko – neretvanskog kantona („Službene novine HNK”, broj: 07/11), donosi

PRAVILNIK**O NAČINU RASPOLAGANJA MINERALNOM SIROVINOM I JALOVINOM ISKOPANOM PRILIKOM IZVOĐENJA GRAĐEVINSKIH I DRUGIH RADOVA****DIO PRVI – OPĆE ODREDBE****Član 1.**

Ovim Pravilnikom uređuje se način raspolaganja mineralnom sirovinom i jalovinom iskopanom na području Hercegovačko-neretvanskog kantona prilikom izvođenja građevinskih i drugih radova u skladu sa propisima kojima se uređuje oblast prostornog uređenja i građenja, obaveze investitora, izvođača radova, ministarstva i jedinica lokalne samouprave, postupanje s mineralnom sirovinom i jalovinom kod izvođenja građevinskih radova, ugovor o prodaji, postupak određivanja cijene, raspodjela prihoda i druga pitanja od važnosti za način raspolaganja mineralnom sirovinom i jalovinom iskopanom prilikom izvođenja građevinskih i drugih radova.

Član 2.

(1) Izrazi upotrijebljeni u ovom Pravilniku imaju slijedeća značenja:

- a) „mineralnom sirovinom” u smislu ovog Pravilnika smatraju se mineralne sirovine navedene u članu 7. Zakona o rudarstvu Hercegovačko - neretvanskog kantona („Službene novine HNK”, broj: 07/11);
- b) „jalovina” je materijal koji se dobije prilikom istražnih, eksploatacionih ili građevinskih i drugih radova, a nema karakter, niti vrijednost mineralne sirovine;
- c) „eksploatacija” je vađenje mineralnih sirovina iz ležišta, njena prerada, oplemenjivanje i stavljanje u promet po osnovu odobrenja za eksploataciju mineralne sirovine i ugovora o

koncesiji.

(2) Izrazi „građenje”, „građevina”, „investitor” i „izvedbeni projekat” uređeni su posebnim zakonom kojim se uređuje oblast prostornog uređenja i građenja.

DIO DRUGI - OBAVEZE INVESTITORA, IZVOĐAČA RADOVA, MINISTARSTVA I JEDINICA LOKALNE SAMOUPRAVE**Član 3.**

(1) Kada pravna i fizička lica, u svojstvu investitora, na osnovu dokumentacije vezane za geološka istraživanja potrebne za izvođenje građevinskih i drugih radova kojima nije svrha eksploatacija, imaju saznanja o postojanju mineralnih sirovina, dužni su prije početka pripremnih radova, odnosno radova, tu činjenicu prijaviti kantonalnom ministarstvu nadležnom za rudarstvo (u daljem tekstu: Ministarstvu).

(2) Pravna i fizička lica, koja prilikom izvođenja građevinskih i drugih radova kojima nije svrha eksploatacija, otkriju mineralne sirovine, dužni su to odmah, a najkasnije u roku sedam dana, prijaviti Ministarstvu.

(3) Pravna i fizička lica koja namjeravaju iskorištavati jalovinu, dužna su to odmah, a najkasnije u roku sedam dana, prijaviti Ministarstvu.

Član 4.

(1) Pravna i fizička lica iz člana 3. ovog Pravilnika su dužna mineralnu sirovinu staviti na raspolaganje Ministarstvu kao vlasniku i o tome obavijestiti nadležnu inspekciju i jedinicu lokalne samouprave.

(2) Obavezu iz stava (1) ovoga člana nema pravno i fizičko lice iz člana 3. ovog Pravilnika ako gradi:

- a) jednostavnu građevinu, odnosno ako izvodi jednostavne radove čijem se građenju, odnosno izvođenju može pristupiti bez akta kojim se odobrava građenje prema posebnom propisu,
- b) novu zgradu, odnosno rekonstruiše postojeću, a za što nije odobreno građenje podzemne etaže,
- c) u slučaju neposredne opasnosti, prirodne ili druge nesreće, odnosno spašavanja ljudi i imovine.

(3) Pravna i fizička lica iz člana 3. ovog Pravilnika dužna su uz obavještenje iz stava (1) ovog člana, dostaviti Ministarstvu i nadležnom inspektoratu:

- a) kopiju akta na osnovu kojeg se gradi građevina,
- b) izvedbeni projekat prema kojem se obavlja iskop,
- c) dokaze o količini i kvaliteti mineralne sirovine,

d) ponudu za otkup i cijenu ukoliko je zainteresovan za mineralnu sirovinu.

Član 5.

Ministarstvo je dužno uz saglasnost jedinica lokalne samouprave u roku od godine dana od dana stupanja na snagu ovog Pravilnika odrediti lokacije za odlaganje mineralne sirovine iz člana 3. ovog Pravilnika.

DIO TREĆI - POSTUPANJE S MINERALNOM SIROVINOM I JALOVINOM KOD IZVOĐENJA GRAĐEVINSKIH RADOVA

POGLAVLJE I. POSTUPANJE S MINERALNOM SIROVINOM I JALOVINOM KADA MINISTARSTVO ISKAŽE NAMJERU DA RASPOLAŽE ISTOM

Odjeljak A. Postupak

Član 6.

(1) Ministarstvo je dužno u roku od 30 dana od dana prijema obavještenja iz člana 3. ovog Pravilnika, iskazati namjeru vezanu za raspolaganje nastalom mineralnom sirovinom.

(2) Mineralnu sirovinu iz člana 3. ovog Pravilnika, Ministarstvu stavljaju na raspolaganje investitor, odnosno izvođač ili podizvođač, koji je moraju ukloniti s gradilišta u skladu s planiranom dinamikom građenja na mjesto odlaganja iz člana 5. ovog Pravilnika.

(3) Ukoliko se pravo raspolaganja mineralnom sirovinom iz člana 3. ovog Pravilnika, riješi prije završetka predmetnih radova u skladu sa ovim Pravilnikom i kada to praktičnost i ekonomičnost nalažu, Ministarstvo može odrediti i drugo mjesto za odlaganje mineralne sirovine.

Član 7.

(1) Ministarstvo može mineralnu sirovinu iz člana 3. ovog Pravilnika prodati neposrednom pogodbom.

(2) Kod prodaje neposrednom pogodbom Ministarstvo će prvo odgovoriti na pismenu ponudu investitora, odnosno izvođača ili podizvođača građevinskih i drugih radova dostavljenu uz obavještenje iz člana 3. ovog Pravilnika.

(3) U slučaju iz stava (2) ovog člana Ministarstvo će o tome obavijestiti i ostale strane koje u svojstvu investitora, izvođača i/ili podizvođača učestvuju u izvođenju tih radova.

(4) U slučaju da uz obavještenje iz člana 3. ovog Pravilnika nije dostavljena ponuda za otkup i cijena

mineralne sirovine, Ministarstvo će prvo pismeno ponuditi prodaju mineralne sirovine investitoru.

(5) U slučaju da investitor nije zainteresovan za kupovinu mineralne sirovine, Ministarstvo će istu ponuditi izvođaču radova.

(6) U slučaju da izvođač radova nije zainteresovan za kupovinu mineralne sirovine, Ministarstvo će istu ponuditi podizvođaču radova ukoliko je angažovan na predmetnom projektu.

Član 8.

U slučaju da Ministarstvo ne odredi svojom odlukom prodaju mineralne sirovine iz člana 3. ovog Pravilnika neposrednom pogodbom, ili postupak iz člana 7. ovog Pravilnika ne završi pozitivnim ishodom, Ministarstvo će provesti postupak javnog nadmetanja za prodaju te mineralne sirovine.

Član 9.

Javno nadmetanje za prodaju mineralne sirovine iz člana 3. ovog Pravilnika Ministarstvo će oglasiti u sredstvima javnog informisanja.

Član 10.

Postupak provođenja javnog nadmetanja iz člana 8. ovog Pravilnika, način određivanja najpovoljnije ponude, iznos kaucije za učešće na javnom nadmetanju kao i ostale elemente bitne za provođenje postupka javnog nadmetanja određuje Komisija za provođenje postupka koju imenuje kantonalni ministar nadležan za rudarstvo (u daljem tekstu: Ministar).

Član 11.

(1) Kriterij za odabir najpovoljnijeg ponuđača u slučaju prodaje javnim nadmetanjem je jedinična cijena / m³ ili ukupno ponuđeni iznos za predmetnu mineralnu sirovinu.

(2) Osnovni kriterij za izbor najpovoljnijeg ponuđača je najviša ponuđena cijena.

(3) U slučaju da prvi sa liste uspješnih ponuđača odbije zaključiti ugovor, gubi pravo na povrat kaucije, a mineralna sirovina se ustupa drugom ponuđaču sa liste.

(4) U slučaju da drugi sa liste uspješnih ponuđača odbije zaključiti ugovor, gubi pravo na povrat kaucije, a mineralna sirovina se ustupa trećem ponuđaču sa liste.

(5) U slučaju da treći sa liste uspješnih ponuđača odbije zaključiti ugovor, gubi pravo na povrat kaucije, a javno nadmetanje se poništava.

Član 12.

(1) Ministarstvo može odrediti svojim aktom da se mineralna sirovina iz člana 3. ovog Pravilnika ugradi u objekte od javnog interesa, bez provođenja javnog nadmetanja.

(2) U aktu iz stava (1) ovog člana moraju se navesti količine mineralne sirovine, te obaveze investitora, mjesto i rok preuzimanja, obaveza vođenja tačne evidencije preuzetih i ugrađenih količina mineralne sirovine i datume ovih radnji, te obaveza izvještavanja Ministarstva svakih šest mjeseci, ukoliko radovi traju duže od ovog perioda.

(3) Po završetku radova investitor je dužan izraditi konačni izvještaj, te predati ga Ministarstvu.

Član 13.

Prema odredbama ovog Pravilnika Ministarstvo će postupati i u slučaju kada Komisija iz člana 14. ovog Pravilnika utvrdi da će prilikom izvođenja građevinskih ili drugih radova nastati određena količina jalovine koja je upotrebljiva i ima svoju vrijednost.

Odjeljak B. Utvrđivanje cijene mineralne sirovine

Član 14.

(1) U slučaju javnog nadmetanja vrstu, kvalitet, količinu i prijedlog početne prodajne cijene mineralne sirovine iz člana 3. ovog Pravilnika utvrđuje stručna komisija koju imenuje Ministar, primjenom stručne metodologije, uzimajući kao osnov tržišne cijene predmetne mineralne sirovine, a u skladu sa pravilima kojima se uređuje izračunavanje koncesione naknade za mineralne sirovine, uz obavezno obrazloženje kriterija na kojima je zasnovan prijedlog komisije.

(2) U slučaju neposredne pogodbe utvrđivanje vrste, kvalitete, količine i prijedloga iznosa naknade mineralne sirovine utvrdit će stručna komisija koju imenuje Ministar, na način utvrđen u stavu (1) ovog člana.

(3) Iznos prijedloga naknade iz stava (2) ovog člana u postupku neposrednog pogađanja može se povećavati ili smanjivati, ali ne može biti manji od iznosa koji bi bio suprotan pravilima kojima se uređuje izračunavanje koncesione naknade za mineralne sirovine.

Član 15.

Kada u svakom konkretnom slučaju komisija iz člana 14. utvrdi da mineralna sirovina iz člana 3. ovog Pravilnika nema ekonomsku vrijednost ili je njena

vrijednost toliko niska da ne bi bilo opravdano ulaziti u dalji postupak, Ministarstvo će obustaviti postupak.

Odjeljak C. Ugovor o prodaji mineralne sirovine

Član 16.

(1) Nakon završetka postupka javnog nadmetanja ili u slučaju prodaje mineralne sirovine neposrednom pogodbom Ministarstvo zaključuje ugovor.

(2) Ugovor iz stava (1) ovog člana se zaključuje u pismenoj formi.

(3) Prije potpisivanja ugovora iz stava (1) ovog člana Ministarstvo će pribaviti pravno mišljenje Kantonalnog javnog pravobranilaštva.

Član 17.

Ugovor iz člana 16. ovog Pravilnika posebno sadrži:

- a) vrstu, kvalitet i količinu mineralne sirovine koja je predmet prodaje,
- b) jediničnu cijenu i ukupan iznos naknade za prodatu mineralnu sirovinu,
- c) način plaćanja,
- d) rokove za preuzimanje mineralne sirovine koja je predmet ugovora,
- e) bankovna garancija u slučaju neizvršavanja ugovorenih obaveza u ugovorenim rokovima,
- f) namjena i rok za iskorištenje mineralne sirovine od strane kupca.

Odjeljak D. Raspodjela prihoda

Član 18.

(1) Omjer raspodjele prihoda od prodajne cijene mineralne sirovine iz člana 3. ovog Pravilnika utvrđuje se na način:

- a) 45% prihod je Budžeta Kantona;
- b) 55% prihod je jedinica lokalne samouprave.

(2) Prihod iz stava (1) ovog člana uplaćuje se prema omjerima u Budžet Kantona i jedinice lokalne samouprave.

Član 19.

Nadzor nad uplatom prihoda od prodane mineralne sirovine iz člana 3. ovog Pravilnika provodi Ministarstvo i Ministarstvo finansija HNK.

POGLAVLJE II. POSTUPANJE S MINERALNOM SIROVINOM I JALOVINOM KADA MINISTARSTVO ODLUČI DA NEĆE RASPOLAGATI ISTOM

Hercegovačko-neretvanskog kantona

Član 20.

(1) U slučaju da Ministarstvo u roku propisanom u članu 6. ovog Pravilnika, odluči da neće raspolagati mineralnom sirovinom stavljenom joj na raspolaganje, o istome će obavijestiti investitora i jedinicu lokalne samouprave.

(2) U slučaju iz stava (1) ovoga člana, mineralnom sirovinom iz člana 3. ovog Pravilnika ima pravo raspolagati jedinica lokalne samouprave, pri čemu je u obavezi na odgovarajući način primijeniti odredbe ovog Pravilnika.

(3) Jedinica lokalne samouprave dužna je Ministarstvu, Ministarstvu finansija i nadležnoj inspekciji dostaviti izvještaj o postupanju s mineralnom sirovinom iz člana 3. ovog Pravilnika u roku 3 mjeseca od kada je stekla pravo na raspolaganje mineralnom sirovinom.

DIO TREĆI – PRELAZNE I ZAVRŠNE ODREDBE

Član 21.

Do određivanja lokacija za odlaganje mineralne sirovine iz člana 3. na način propisan članom 5. ovog Pravilnika, Ministarstvo je dužno u roku od 15 dana od dana zaprimanja obavještenja iz člana 3. ovog Pravilnika odrediti lokaciju za odlaganje mineralne sirovine i o istome obavijestiti investitora i jedinicu lokalne samouprave.

Član 22.

Po odredbama od člana 8. do člana 21. ovog Pravilnika Ministarstvo će postupati i kada bez prijave pravnog i fizičkog lica iz člana 3. ovog Pravilnika ima saznanja o postojanju određene količine mineralne sirovine i/ili jalovine koja je nastala uslijed drugih radova kojima nije svrha eksploatacija mineralne sirovine.

Član 23.

Danom stupanja na snagu ovog Pravilnika prestaje primjena Pravilnika o načinu raspolaganja mineralnom sirovinom i jalovinom iskopanom prilikom izvođenja građevinskih i drugih radova („Službene novine HNK”, broj: 8/12).

Član 24.

Postupci koji nisu riješeni do dana stupanja na snagu ovog Pravilnika, riješit će se po odredbama ovog Pravilnika.

Član 25.

Ovaj Pravilnik stupa na snagu osmog dana od dana objave u „Službenim novinama Hercegovačko-neretvanskog kantona”.

Bosna i Hercegovina
Federacija Bosne i Hercegovine
Hercegovačko-neretvanski kanton
Ministarstvo privrede

Broj: 07-02-02-706-3/12
Mostar, 18.03.2013. godine

Ministar
Amer Zagorčić, s.r